

Austrheim kommune **Sommaren 2021**

- ein aktiv sommar for store og små



Sommarskule

Sommarskule var eit nytt tiltak sommaren 2021. Det vart betalt av UDIR, som støtta oss med 328 000 kroner. Tiltaket var veldig populært, og mange har allereie spurt om det vert slike aktivitetar sommaren 2022.

Aktivitetane i tiltaket:

Forskarfabrikken: 2 grupper over 2 veker. Det var fullt første veka (25 elevar). Andre veka deltok 8 elevar.

Lær deg å ro og segla: 5.-10. klasse. Her deltok 7 barn og unge. Denne aktiviteten gjekk dessverre samtidig med forskarfabrikken veke 1, som mange hadde meldt seg på. Dermed gjekk me glipp av ein del som hadde ønske om å vera med. Dessverre kunne ikkje instruktørane andre veker enn denne. Dei som var med på dette var veldig nøgde, og foreldra skryt endå av aktiviteten.

Introkurs havkajakk: 5.-7. klasse. Austrheim Idrettslag – padlegruppa var instruktørar her. Kurset vart fullt med 12 deltakarar. Veldig populært for denne aldersgruppa, venteliste for å kunne delta.

Grunnkurs havkajakk: 8. Klasse - 2 vgs. Her var det ikkje så stor interesse som blant dei yngre, men me fekk fylt opp alle plassane med ungdommar som hadde fått jobb under HavGlede. 15 ungdommar deltok.

Teikne og målekurs: 7.-10. klasse. 7 ungdommar som skulle starta i 8. klasse til hausten deltok her.

Båtførarprøve med praksis i båt og førstehjelpskurs: 14-17 år. Dette kurset vart fort fylt opp, og det var venteliste for å få vera med. Foreldre var veldig nøgde med at ungdommane ikkje berre fekk teori med seg på kurset, men også fekk køyra båt, førstehjelpskurs og testa ut korleis det er å redda nokon opp frå sjøen. 20 ungdommar deltok på dette kurset.

SommarStorband: 4.-7. klasse. Utsett til haustferien. I haustferien deltok 29 barn og unge frå 3.-6. klasse på denne aktiviteten. Det var ungdommar som var instruktørar, lagde mat og hadde aktivitetar for gjengen.

Aktivitetsdagar med 5 ungdommar frå idrettslaget: 2 grupper: 1.-3. klasse i to dagar, og 4.-5. klasse i tre dagar. Dette var veldig populært, spesielt for dei i 1.-3. klasse. Her var det venteliste på å få vera med.

For meir informasjon om alle aktivitetane kan du gå til @SommarAustrheim på Facebook.



Sommaraktivitetar for Ungdom sponsa av Gjensidigestiftelsen.

Austrheim ungdomsklubb fekk 298 200 kroner frå Gjensidigestiftelsen til aktivitetar, og til å betale ungdommar som sommarhjelp ved ulike aktivitetar. Av denne støtta gjekk kr 179 000 til lønn til ungdommar som arbeidde i sommar. Nokre av aktivitetane me hadde planlagt gjekk inn som sommarskuleaktivitet, og dermed hadde me meir pengar til å betala fleire ungdommar. Dei arbeidde ca. 800 timar denne sommaren.

Noko av støtta gjekk til nytt aktivitetsutstyr, som ny turnmadrass i hallen og ny aktivitet under HavGlede (sjå bilde).



Dato	3.6 & 6.6	22.jun	25.6	29.6	01.7	06.7	08.7	13.7	15.7	20.7	22.7	25.7	HAVGLEDE 30.7-8-8
Aktivitet	Havsport	Fotball og baking	Open hall	Havsport	Open hall	Havsport	Open hall	Havsport	Havsport	FlipZone	Høyt og lavt	Snorkling	Padling Fiskekonkurranse Eigen ungdomskveld
Sommarjobb Tal på ungdommar pr. aktivitet	2	2	2	2	2	2	2	4	2	0	0	2	29 (i snitt jobba dei tre dagar kvar)

HavGlede

HavGlede er eit lågterskeltilbod som har vore arrangert i 5 år av ungdommane i Austrheim. Ungdommar har i alle år jobba dugnad for å få til HavGlede. Det har vore alt frå 10-25 ungdommar i sving. I år var vi så heldige at Gjensidige gav oss støtte til å kunna betala dei frivillige. Me hadde 29 ungdommar i arbeid med HavGlede-aktivitetar i sommar. HavGlede er eit samarbeid med Austrheim Idrettslag – padlegruppa. Dei bidrar med aktivitet, sikkerheitstiltak og god stemning.

Aktivitetstilbodet som starta i 2017 har auka frå 7 kajakkar, 3 Supbrett, 2 kanoar, vasstrampoline og ein katapult til dette:



All investering av utstyr er med hjelp av Sparebanken vest, Gjensidigestiftelsen, Frifondsmidlar frå Ungdom og Fritid og BUFDIR-midlar.

Austrheim kommune betalar for leige av Havsporthuset på Mastrevik kai kor me arrangerer dei fleste av HavGlede sine aktivitetar. I tillegg har Austrheim ungdomsklubb ei bu i Årvika friluftsområde med fire kajakkar, tre Supbrett, grillar og ein Runnerz. Austrheim kommune har avtale med Austrheim vidaregåande skule om bruk av utstyr og lokale for 30 000 kroner i året.

Aktivitetar som høyrer inn under HavGlede:

- Ungdomsklubb på Mastrevik kai og i Årvika friluftsområde.
- Padleglede med Friskusane i samarbeid med Austrheim idrettslag. anna kvar tysdag frå mai tom september.
- Spontane familiedagar på Mastrevik kai i løpet av juni og juli.
- Mjuk skulestart for ungdomsskuletrinnet ved oppstart om hausten.



- HavGlede-festival i juli og august - 10 dagar med aktivitet.

Program HavGlede 2021:

25.7 Snorkling i Øksnes friluftsområde for aldersgruppa 8-12 år. Her vart det investert i snorkleutstyr til aldersgruppa med midlar frå Sparebanken ves - NY AKTIVITET 2021

30.7 Familiedag i Årvika friluftsområdet.

31.7 & 1.8 Familiedagar Mastrevik kai (vi måtte dra frå Årvika pga. av sterk nordavind, vi pleier å vera heile helga i Årvika.

3.8 Ungdomsklubb på Mastrevik kai.

4.8 Fiskekonkurranse for heile familien - NY AKTIVITET 2021

5.8 FRISKUS-tur til Fedje.

6.-8.8 Familiedagar på Mastrevik kai.



Familiedagane som vert arrangerte under HavGlede har aukande besøkstal for kvart år. Folk kjem frå nær og fjern, som Sotra, Arna, Askøy og Radøy. Mange av dei som kjem er her heile dagen (6 timar). Er familiedagane på ein kvardag, så har me 50-60 besøkande dei 3 timane vi er opne. I helger med fint vêr kan det komma mellom 300-350 besøkande innom. Me har ein regel under Familiedagane, og det er at ein ikkje får bruka utstyret vårt utan flytevest. Dette gjeld både vaksne og barn. Me har tilbod om lån av flytevestar og våtdrakter. Etter 2-3 timar er det tomt for flytevestar og våtdrakter til barn. Me har ca. 80 flytevestar til utlån.

Slik besøket har vore i sommar, skulle Havsportsenteret vore opne for publikum 1-2 dagar i veka gjennom sommar månadene. Dette vil gje aktivitet til mange, og tiltrekke «turistar» frå andre kommunar. Det å halda Havsportsenteret opne kan vera ein flott sommarjobb for yngre vaksne og for ungdommar i alderen 15-20 år. Det kan vera ein idé å ha eit samarbeid med Austrheim svømmeklubb om å leiga inn nokon som har livredningskurs til badevakter om vi ikkje utdannar dei som får sommarjobbar sjølv.

Me ser at med auka besøk på Havsportsenteret må fasilitetane oppgraderast, og dei som driftar anlegget i dag må få meir hjelp. Det me treng å gjera noko med er:

Toaletta må oppgraderast: I dag er toaletta lause og vaskane er flekkete, golvmaling flassar og det er rust på veggane av saltvatnet. På eitt av toaletta er lister og nedre del av veggen full av museavføring som ikkje går vekk med vasking.

Me manglar **handikaptoalett**: Ein i rullestol kan komma seg inn i kiosken vår og kjøpa noko å drikka, men må vedkomande på toalettet, må han eller ho berast inn, eller ta turen opp på bensinstasjonen.

Garderobane treng nytt golvbelegg og sluk i golvet: I dag er det lagt eit mellombels golv. Dette er ikkje særleg hygienisk lenger, for all skit legg seg under flisene, og skal vi få dette opp må heile golvet rivast. Det vart lagt og betalt av ungdomsklubben i ei tid der det ikkje var like mange brukarar som i dag. Veggane treng å verta bytta til baderomsveggar og skiljeveggane bør tåla vatn. I dag er det limt dusjforheng på MDF-plater som skiljevegg.

Tørkerommet treng betre sluk og nytt golvbelegg: Alle dei dårlege golvflatene gjer det vanskeleg å halda reint.

Austrheim ungdomsklubb stod for ei stor oppgradering av kjøkken- og kioskområdet i 2019. Dei la inn 40 000 kroner i dette, og har ikkje midlar til å gjera noko meir.

Me har leigetakarar i bygget, som Austrheim vidaregåande og Nordhordland dykkarklubb. Me har ansvar for å ha gode hygieniske høve på Havsportsenteret.

I dag er det ungdomskoordinator som vaskar og held orden i huset. Det å måtta starta eller enda eit skift med å vaska toalett og garderobar, feia fellesområdet og vaska og ordna kjøkken, kan vera litt mykje i tillegg til å få utstyr på plass, henga opp vådrakter og passa på sikkerheita. I tillegg må ein ned med jamne mellomrom for å vaska toaletta og tømme boss-spanna etter at Austrheim vgs. har brukt huset. Dei brukar det 2-3 gongar i veka i sesongen. Det er eit ønskje at Havsporthuset kan komma inn i vaskerotasjonen i kommunen når det er sesong (mai-august). Me treng hjelp til vask av toalett, støvsuging og vask i garderobane, vask av golv kjøkken/kiosk.



Oppsummering sommar i Austrheim 2021

Austrheimingane har vore verbale om at denne sommaren har vore ein fantastisk sommar med mange aktivitetar. Austrheimingane forstår at det er på grunn av korona at tilboda vore mange og gratis. Etter samtalar med foreldre under aktivitetar, på senteret eller på tur med hundane mine så er tilbakemeldinga at me treng aktivitet om sommaren. Aktivitetane treng kanskje ikkje vera så mange, og treng nødvendigvis ikkje vera heilt gratis, men aktivitet bør det vera. Det er ikkje alle som har råd til å reisa på ferie, og nokon kan heller ikkje reisa om sommaren. Kommunestyret bør vurdere om dei skal budsjettera for nokre aktivitetar sommaren 2022. Det treng ikkje vera dei dyre aktivitetane som vi leiger inn instruktørar til, men me kan bruka ungdommar som er flinke i ulike aktivitetar og lag og organisasjonar (Idrettslaget og korpset er gode eksempel).

Sommarskule var eit attraktivt og ønska tilbod til dei i alderen 1.-7. klasse. Dei eldre ungdommane viste lite interesse for dei ulike aktivitetane. Om det var fordi aktivitetane låg ute som Sommar**SKULE**, eller om dei ikkje var stått opp tidleg nok for å kunne delta, er me ikkje heilt sikre på. Det som fenga ungdommen var båtførarprøven med praksis og teori, tur til «Høyt og lavt» og tur til «FlipZone».

Gjensidigemidlane viste eit stort behov for sommarjobb for dei i alderen 15-18 år. Det å setja av pengar i budsjettet til sommarjobb, med tanke på aktivitet for dei yngre, er ein vinn-vinn-situasjon. Ungdommane får vera aktive, tena pengar og får arbeidserfaring. Dei yngste får ein aktivitet.

HavGlede er eit populært tilbod både blant Austrheimingane, hyttefolk og tilreisande. Sitat frå nokon som bur på Kaland: «Me har ikkje vore så mykje på denne sida av Austrheim på lenge, men denne sommaren har me vore her fleire gongar i veka». Sitat frå hytteeigar på Mjøs: «Eg har ei 8 år gammal jente som seier at dette er den kjekkaste sommaren EVER, og vi har vore mange dagar på Mastrevik kai, både når det har vore ope og har også vore der og brukt utstyret som ligg på sjøen når det ikkje er ope.» Nokon reiste langt, frå ytst ute på Sotra, dei sa dette: «Eg tar med strikkesøyet, gubben snakkesøyet, og gutungen storkosar seg i sjøen»

Denne auka av besøkande på HavGlede gjer at me må ta stilling til kva Austrheim kommune skal satsa på når det kjem til Havsporthuset og HavGlede. Me treng å spørja oss desse spørsmåla:

HavGlede held på å veksa over hovudet på oss som driftar det i dag.

Me håpar med desse orda, at det vert sett av nokre midlar til ulike aktivitetar i sommar for barn og unge og midlar til sommarjobb for ungdom. Eg trur kommunen vil få det igjen på lang sikt med aktive barn og unge.



Kva er målet med HavGlede?

Kor stort skal det verta?

Kven er målgruppa?

Bør det verta ein eigen organisasjon?